

欽定元史

卷一百四十三之一百五十二

欽定元史

卷一百一十五

元史卷一百四十三

明翰林學士顯中大夫知制誥兼修國史宋 濂等修

列傳第三十

馬祖常

馬祖常字伯庸世爲雍古部居靖州天山有錫里吉思者於祖常爲高祖金季爲鳳翔兵馬判官以節死贈恆州刺史子孫因其官以馬爲氏曾祖月合乃從世祖征宋留汴掌饋餉累官禮部尙書父潤同知漳州路總管府事家于光州祖常七歲知學得錢卽以市書十歲時見燭欹燒屋解衣沃水以滅火咸嗟異之旣長益篤于學蜀儒張頌講道儀真往受業其門質以疑義數十頌甚器之延祐初科舉法行鄉貢會試皆中第一廷試爲第二人授應奉翰林文字拜監察御史是時仁宗在御已久猶居東宮飲酒常過度祖常上書請御正衙立朝儀御史執簡太史執筆則雖有懷姙利己乞官求賞者不敢出諸口天子承天地祖宗之重當極調攝至於酒醴近侍進御當思一獻百拜之義英宗爲皇太子又上書請慎簡師傅於是姦臣鐵木迭兒爲丞相威權自恣祖常知其盜觀國史率同列劾奏其十罪仁宗震怒黜罷之秦州山移祖常言山不動之物今而動焉由在野有當用不用之賢在官有當言不言之佞故致然爾疏聞大臣

皆家居待罪祖常薦賢拔滯知無不言俄改宣政院經歷月餘辭歸起爲社稷署令亡何姦臣復相左遷
聞平縣尹因欲中傷之遂退居光州久之姦臣既死乃除翰林待制奏定建儲擢典寶少監太子左贊善
尋兼翰林直學士除禮部尙書丁祖母憂起爲右贊善復除禮部尙書尋辭歸天祿元年召爲燕王內尉
仍入禮部兩知貢舉一爲讀卷官時稱得人陞參議中書省事參定親郊禮儀充讀冊祝官拜治書侍御
史歷徽政副使遷江南行臺中丞元統元年召議新政賜白金二百兩鈔萬貫又歷同知徽政院事遂拜
御史中丞帝以其有疾詔特免朝禮光祿日給上尊祖常持憲務存大體西臺御史劾其僚禁酷時面有
酒容以苛細黜之山東廉訪司言孔氏訟事以事關名教不行按者亦引去除樞密副使頃之辭職歸光
州復除江南行臺中丞又遷陝西行臺中丞皆以疾不赴至元四年卒年六十贈摠忠宣憲協正功臣河
南行省右丞上護軍魏國公諡文貞祖常立朝旣久多所建明嘗議今國族及諸部旣誦聖賢之書當知
尊諸母以厚彝倫又議將家子弟驕脆有孤任使而庶民有挽強蹶張老死草野者當建武學武舉儲材
以備非常時雖弗用識者達之祖常工於文章宏瞻而精核務去陳言專以先秦兩漢爲法而自成一家
之言尤致力於詩圓密清麗大篇短章無不可傳者有文集行于世嘗預修英宗實錄又譯潤皇圖大訓
承華事略又編集列后金鑑千秋記略以進受賜優渥文宗嘗駐蹕龍虎臺祖常應制賦詩尤被歎賞謂

中原碩儒唯祖常云

巖巖

巖巖字子山康里氏父不忽木自有傳祖燕真事世祖從征有功巖巖幼隸業國學博通羣書其正心修身之要得諸許衡及父兄家傳長襲宿衛風神凝遠制行峻潔望而知其爲貴介公子其遇事英發掀髯論辨法家拂士不能過之始授承直郎集賢待制遷兵部郎中轉祕書監丞奉命往覈泉舶并視珠犀不少留目改同僉太常禮儀院事拜監察御史陞河東廉訪副使未上遷祕書太監陞侍儀使尋擢中書右司郎中遷集賢直學士轉江南行臺治書侍御史拜禮部尙書監羣玉內司巖巖正色率下國制大樂諸坊咸隸本部遇公譏衆伎畢陳巖巖視之泊如僚佐以下皆肅然遷領會同館事尙書監羣玉內司如故尋兼經筵官復除江南行臺治書侍御史未行留爲奎章閣學士院承制學士仍兼經筵官陞侍書學士同知經筵事復陞奎章閣學士院大學士知經筵事除浙西廉訪使復留爲大學士知經筵事尋拜翰林學士承旨知制誥兼修國史知經筵事提調宣文閣崇文監先是文宗勵精圖治巖巖嘗以聖賢格言講誦帝側裨益良多順帝卽位之後翦除權姦思更治化巖巖侍經筵日勸帝務學帝輒就之習授欲罷以師禮巖巖力辭不可凡四書六經所載治道爲帝紬繹而言必使辭達感動帝衷敷暢有意而後已若柳

宗元梓人傳張商英七臣論尤喜誦說嘗於經筵力陳商英所言七臣之狀左右錯愕有嫉之之色然素知其賢不復肆愠帝暇日欲觀古名畫囑囑卽取郭忠恕比干圖以進因言商王受不聽忠臣之諫遂亡其國帝一日覽宋徽宗畫稱善囑囑進言徽宗多能惟一事不能帝問何謂一事對曰獨不能爲君爾身辱國破皆由不能爲君所致人君貴能爲君它非所尙也或遇天變民災必憂見於色乘間則進言于帝曰天心仁愛人君故以變示儆譬如慈父於子愛則教之戒之子能起敬起孝則父怒必釋人君側身修行則天意必回帝察其真誠虛己以聽特賜只孫燕服九襲及玉帶楮幣以旌其言囑囑嘗謂人曰天下事在宰相當言宰相不得言則臺諫言之臺諫不敢言則經筵言之備位經筵得言人所不敢言於天子之前志願足矣故於時政得失有當匡救者未嘗緘默大臣議罷先朝所置奎章閣學士院及藝文監諸屬官囑囑進曰民有千金之產猶設家塾延館客豈有堂堂天朝富有四海一學房乃不能容耶帝聞而深然之卽日改奎章閣爲宣文閣藝文監爲崇文監存設如初就命囑囑董治又請置檢討等職十六員以備進講帝皆允時科舉旣輟囑囑從容爲帝言古昔取人材以濟世用必有科舉何可廢也帝采其論尋復舊制一日進讀司馬光資治通鑑因言國家當及斯時修遼金宋三史歲久恐致闕逸後置局纂修實由囑囑發其端又請行鄉飲酒于國學使民知遜悌及請褒贈唐劉蕡宋邵雍以旌道德正直帝從

其請爲之下詔囑囑以重望居高位而雅愛儒士甚於饑渴以故四方士大夫翕然宗之萃於其門達官有怙勢者言曰儒有何好君酷愛之囑囑曰世祖以儒足以致治命裕宗學於贊皇王恂今祕書所藏裕宗倣書當時御筆於學生之下親署御名習書謹呈其敬慎若此世祖嘗暮召我先人坐寢榻下陳說四書及古史治亂至丙夜不寐世祖喜曰朕所以令卿從許仲平學正欲卿以嘉言入告朕耳卿益加懋敬以副朕志今汝言不愛儒寧不念聖祖神宗篤好之意乎且儒者之道從之則君仁臣忠父慈子孝人倫咸得國家咸治違之則人倫咸失家國咸亂汝欲亂而家吾弗能禦汝慎勿以斯言亂我國也儒者或身若不勝衣言若不出口然腹中貯儲有過人者何可易視也達官色慙旣而出拜江浙行省平章政事明年復以翰林學士承旨召還時中書平章闕員近臣欲有所薦用以言規帝意帝曰平章已有其人今行半途矣近臣知帝意在囑囑不復薦人至京七日感熱疾卒實至正五年五月辛卯也年五十一家貧幾無以爲殮帝聞爲震悼賜賻銀五錠其所負官中營運錢臺臣奏以罰布爲之代償囑囑善真行草書識者謂得晉人筆意單牘片紙人爭寶之不翅金玉謚文忠兄回回字子淵敦默寡言嗜學能文在成宗朝宿衛擢太常寺少卿寺改爲院爲太常院使武宗正位以藩邸舊臣出使稱旨至大間調大司農卿除山南廉訪使改江南行臺治書侍御史遷淮西廉訪使皆有政聲再改河南廉訪使行省丞相行事多不法

太尉納璘爲郎中每格不下丞相怒欲出之回回察其賢抗章舉任風憲後歷三臺爲名臣駙馬平章家奴強市人物按之無所貸英宗卽位丞相拜住首薦爲戶部尙書尋拜南臺侍御史改參議中書以議定刑書如法帝嘉納其奏奉定初廷議漕運事奏減糧數以紓東南民力授太子詹事丞改山東廉訪使未上陞翰林侍講學士遷江浙行省右丞文宗立除宣政院使上言乞沙汰僧道其所有田宜同民間徵輸擢中書右丞力辭還第聞明宗崩流涕不能食自是杜門不出者數年以疾卒與弟巖巖皆爲時之名臣世號爲雙巖云巖巖子維山材質清劬侍禁廷起崇文監丞擢給事中遷同僉太常禮儀院事調崇文太監

自當

自當蒙古人也英宗時由速古兒赤擢監察御史錄囚大興縣有以冤事繫獄者其人嘗見有橐駝死道傍因昇至其家醢之置數甕中會官橐駝被盜捕索甚亟乃執而勘之其人自誣服自當審其獄辭疑爲冤卽以上御史臺臺臣以爲賊旣具是特御史畏殺人耳不聽改委他御史讞之竟處死後數日遼陽行省以獲盜聞冤始白人以是服其明泰定二年扈從至上都糾言參知政事楊庭玉贓罪不報卽納印還京師帝遣使追之俾復任卽再上章劾庭玉竟如其言又劾奏平章政事禿滿迭兒入怯薛之日英宗被

祇必預聞其謀不省反賜充滿迭兒黃金雞腰自當遂辭職改工部員外郎中書省委開混河自當往視之以爲水性不常民力亦瘁難以成功言于朝河役乃罷會次三皇后殂命工部撤行殿車帳皆新作之自當未卽興工尙書曰此奉特旨員外有悞則罪歸於衆矣自當曰卽有罪我獨任之未幾帝果問成否省臣乃召自當責問之自當請自入對既見帝奏曰皇后行殿車帳尙新若改作之恐勞民費財且先皇后無惡疾居之何嫌必欲捨舊更新則大明殿乃自世祖所御列聖嗣位豈皆改作乎帝大悅語省臣曰國家用人當擇如自當者庶不悞大事特賜上尊金幣遷吏部員外郎帝欲加號太后曰太皇太后命朝堂議之自當獨曰太后稱太皇太后於典禮不合衆皆曰英宗何以加皇太后號曰太皇太后自當曰英宗孫也今上子也太皇太后之號孫可以稱之子不可以稱之也議遂定遷中書客省使俄改同僉宣政院事文宗卽位除中書左司郎中有使持詔自江浙還言行省臣意若有不服者帝怒命遣使問不敬狀將悉誅之自當言於丞相燕帖木兒曰皇帝新卽位雲南四川且猶未定乃以使臣一言殺行省大臣恐非盛德事況江浙豪奢之地使臣或不得厭其所需則造言以陷之耳燕帖木兒以言于帝事乃止既而陞參議中書省事燕帖木兒議封太保伯顏王爵衆論附之自當獨不言燕帖木兒問故自當曰太保位列三公而復加王封後再有大功將何以處之且丞相封王出自上意今欲加太保王封丞相宜請于上

王爵非中書選法也遂罷其議拜治書侍御史初文宗在集慶潛邸欲創天靈寺令有司起民夫江南行臺監察御史亦乞刺台言曰太子爲好事宜出錢募夫若欲役民則朝廷聞之非便也至是文宗悉召江南行臺監察御史俾皆入爲監察御史而欲黜亦乞刺台自當諫曰當陛下在潛邸時御史盡心爲陛下言乃忠臣也今無罪而黜之非所以示天下乃除亦乞刺台僉憲湖南文宗嘗欲游西湖自當諫曰陛下以萬乘之尊而汎舟自樂如天下何不聽自當遂稱疾不從行文宗在舟中顧謂臺臣曰自當終不滿朕此游耶臺臣嘗奏除目文宗以筆塗一人姓名而綴將作院官閭閻之名自當言閭閻爲人訴諧惟可任教坊司若以居風紀則臺綱掃地矣文宗乃止已而出爲陝西行臺侍御史順帝初除福建都轉運鹽使先是自當爲左司郎中時奉定帝嘗欲以河間江浙福建鹽引六萬賜中書叅議撒迪自當執不可僅以福建鹽引二萬賜之至是自當復建言鹽引宜盡資國用以紓民力時撒迪方爲御史大夫不以爲怨數遣人省自當母于京師所居旣而丁母憂居閒久之復起爲浙西肅政廉訪使時有以駙馬爲江浙行省丞相者其官豎恃公主勢坐杭州遙魯花赤位令有司強買民間物不從輒毆之有司來白自當自當卽遽之械以令衆自是丞相府無敢爲民害者尋召爲同僉樞密院事尋復爲治書侍御史同知經筵事竇夏人有告賈買等謀害太師伯顏者伯顏委自當與中書樞密等官往寧夏鞫問無其情乃以誣罔坐告

者罪伯顏怒自當前曰太師所以令吾三人勘之者以國法所在也必以罪吾三人則自當實主其事宜獨當之伯顏乃左遷自當同知徽政院事自當歷事四朝官自從仕郎累轉至通奉大夫常衍衍在位剛介弗回終始一節有古遺直之風然卒以是忤權貴而不復柄用君子皆惜焉

阿榮

阿榮字存初怯烈氏父按攤中書右丞阿榮幼事武宗儲宿衛累遷官爲湖南道宣慰副使溫迪罕奉使宣撫湖南事無大小悉以委之會列郡歲饑阿榮分其廩祿爲粥以食餓者仍發粟賑之所活甚衆廣西寇起衆皆洶懼阿榮鎮之以靜督有司治兵守其境寇不敢入遷湖廣行省左右司郎中召會福院事尋除吏部尙書泰定初出爲湖南宣慰使改浙東道宣慰使都元帥以疾辭天厯初復起爲吏部尙書尋參議中書省事二年拜中書參知政事知經筵事進奎章閣大學士榮祿大夫太禧宗禋院使都典制神御殿事文宗眷遇之甚而阿榮亦盡心國政知無不言久之心忽鬱鬱不樂謁告南歸武昌至元元年卒初阿榮閒居以文翰自娛博究前代治亂得失見其會心者則扼腕曰忠臣孝子國家之寶爲奇男子烈丈夫者固不當如是耶日與韋布之士游所至山水佳處鳴琴賦詩日夕忘返尤深於數學逆推事成敗利不利及人禍福壽夭貴賤多奇中天厯三年春策士于廷阿榮與虞集會于直廬慨然興歎語集曰更

一科後科舉當輟輟兩科而復復則人材彬彬大出矣又歎曰榮不復見之矣君猶及見之集應曰是士之多幸如存初言今文治方興未必有中輟之理存初國家世臣妙於文學以盛年登朝在上左右斯文屬望集老且衰見亦何補耶阿榮又歎曰數當然耳集問何以知之弗答後三年卒元統三年科舉果罷至正元年始復如其言

小雲石海涯

小雲石海涯家世見其祖阿里海涯傳其父楚國忠惠公名貫只哥小雲石海涯遂以貫爲氏復以酸齋自號母廉氏夜夢神人授以大星使吞之已而有妊及生神采秀異年十二三膂力絕人使健兒驅三惡馬疾馳持槊立而待馬至騰上之越二而跨三運槊生風觀者辟易或挽疆射生逐猛獸上下峻阪如飛諸將咸服其趨捷稍長折節讀書目五行下吐辭爲文不蹈襲故常其旨皆出人意表初襲父官爲兩淮萬戶府達魯花赤鎮永州御軍極嚴猛行伍肅然稍暇輒投壺雅歌意所暢適不爲形跡所拘一日呼弟忽都海涯語之曰吾生宦情素薄顧祖父之爵不敢不襲今已數年矣願以讓弟弟幸勿辭語已卽解所綰黃金虎符佩之比從姚燧學燧見其古文峭厲有法及歌行古樂府慷慨激烈大奇之仁宗在東宮聞其以爵位讓弟謂宮臣曰將相家子弟其有如是賢者耶俄選爲英宗潛邸說書秀才宿衛禁中仁宗踐

祚上疏條大事一曰釋邊戍以修文德二曰教太子以正國本三曰設諫官以輔聖德四曰表姓氏以旌勳賢五曰定服色以變風俗六曰舉賢才以恢至道書凡萬餘言未報拜翰林侍讀學士中奉大夫知制誥同修國史會議科舉事多所建明忽喟然嘆曰辭尊居卑昔賢所尚也今禁林清選與所讓軍資孰高人將議吾後矣乃稱疾辭還江南賣藥於錢唐市中詭姓名易服色人無有識之者偶過梁山濤見漁父織蘆花爲被欲易之以紬漁父疑其爲人陽曰君欲吾被當更賦詩遂援筆立成竟持被去人間喧傳蘆花被詩其依隱玩世多類此晚年爲文日寢詩亦沖澹草隸等書稍取古人之所長變化自成一家所至士大夫從之若雲得其片言尺牘如獲拱璧其視死生若晝夜絕不入念慮脩飾若欲遺世而獨立云奉定元年五月八日卒年三十九贈集賢學士中奉大夫護軍追封京兆郡公諡文靖有文集若干卷直解孝經一卷行于世子男二人阿思蘭海牙慈利州達魯花赤次八三海涯孫女一人有學識能詞章歸懷慶路總管段謙云

泰不華

泰不華字兼善伯牙吾台氏初名達普化文宗賜以今名世居白野山父塔不台入直宿衛歷仕台州錄事判官遂居於台家貧好讀書能記問集賢待制周仁榮養而教之年十七江浙鄉試第一明年對策大

廷則進士及第授集賢修撰轉秘書監著作郎拜江南行臺監察御史時御史大夫脫歡怙勢貪暴泰不
華劾罷之文宗建奎章閣學士院擢爲典籤拜中臺監察御史順帝卽位加文宗后太皇太后之號大臣
燕鐵木兒伯顏皆列地封王泰不華率同列上章言嬖母不宜加徽稱相臣不當受王上太后怒欲殺言
者泰不華語衆曰此事自我發之甘受誅戮決不敢累諸公也已而太后怒解曰風憲有臣如此豈不能
守祖宗之法乎賜金幣二以旌其直出僉河南廉訪司事俄移淮西繼遷江南行御史臺經歷辭不赴轉
江浙行省左右司郎中浙西大水害稼會泰不華入朝力言於中書免其租擢秘書監改禮部侍郎至正
元年除紹興路總管革吏弊除沒官牛租令民自實田以均賦役行鄉飲酒禮教民興讓越俗大化召入
史館與修遼宋金三史書成授秘書卿陞禮部尙書兼會同館事黃河決奉詔以珪玉白馬致祭河神竣
事上言惟安以東河入海處宜倣宋置撩清夫用混江龍鐵掃撼蕩沙泥隨潮入海朝廷從其言會用夫
屯田其中廢八年台州黃巖民方國珍爲蔡亂頭王伏之讎逼遂入海爲亂劫掠漕運糧執海道千戶
德流于實事聞詔江浙叅政朶兒只班總舟師捕之追至福州五虎門國珍知事危焚舟將遁官軍自相
驚潰朶兒只班遂被執國珍迫其上招降之狀朝廷從之國珍兄弟皆授之以官國珍不肯赴勢益暴橫
九年詔泰不華察實以聞既得其狀遂上招捕之策不聽尋除江東廉訪使改翰林侍讀學士知制誥同

修國史已而出爲都水庸田使十年十二月國珍復入海燒掠沿海州郡十一年二月詔李羅帖木兒爲江浙行省左丞總兵至慶元以泰不華諭知賊情狀遷浙東道宣慰使都元帥分兵于温州使夾攻之未幾國珍寇溫泰不華縱火筏焚之一夕遁去旣而李羅帖木兒密與泰不華約以六月乙未合兵進討李羅帖木兒乃以壬辰先期至大閭洋國珍夜率勁卒縱火鼓譟官軍不戰皆潰赴水死者過半李羅帖木兒被執反爲國珍飾辭上聞泰不華聞之痛憤輟食數日朝廷弗之知復遣大司農達識帖木邇等至黃岩招之國珍兄弟皆登岸羅拜退止民間小樓是夕中秋月明泰不華欲命壯士襲殺之達識帖木邇適夜過泰不華密以事白之達識帖木邇曰我受詔招降耳公欲擅命耶事乃止檄泰不華親至海濱散其徒衆拘其海舟兵器國珍兄弟復授官有差旣而遷泰不華台州路達魯花赤十二年朝廷征徐州命江浙省臣募舟師守大江國珍懷疑復入海以叛泰不華自分以死報國發兵扼黃巖之澄江而遣義士王大用抵國珍示約信使之來歸國珍益疑拘大用不遣以小舸二百突海門入州港犯馬鞍諸山泰不華語衆曰吾以書生登顯要誠慮負所學今守海隅賊甫招徠又復爲變君輩助我擊之其克則汝衆功也不克則我盡死以報國耳衆皆踴躍願行時國珍戚黨陳仲達往來計議陳其可降狀泰不華率部衆張受降旗乘潮而前船觸沙不能行垂與國珍遇呼仲達申前議仲達目動氣索泰不華覺其心異手斬之

卽前擣賊船射死五人賊躍入船復斫死二人賊舉槳來刺輒斫折之賊羣至欲抱持過國珍船泰不華
瞋目叱之脫起奪賊刀又殺二人賊攢槳刺之中頸死猶植立不仆投其屍海中年四十九時十二年三
月庚子也僮名抱琴及臨海尉李輔德千戶赤盡義士張君璧皆死之泰不華旣沒除江浙行省叅知政
事行台州路達魯花赤事不及聞命已後三年追贈榮祿大夫江浙行省平章政事柱國封魏國公諡忠
介立廟台州賜額崇節泰不華尙氣節不隨俗浮沉太平爲臺臣劾去相位泰不華獨餞送都門外太平
曰公且止勿以我累公泰不華曰士爲知己死寧畏禍耶後雖爲時相擯斥人莫不韙之善篆隸溫潤遒
勁嘗重類復古編十卷攷正譌字於經史多有據云

余闕

余闕字廷心一字天心唐元氏世家河西武威父沙刺臧卜官廬州遂爲廬州人少喪父授徒以養母與
吳澄弟子張恆游文學日進元統元年賜進士及第授同知泗州事爲政嚴明宿吏皆憚之俄召入應奉
翰林文字轉中書刑部主事以不阿權貴棄官歸尋以修遼金宋三史召復入翰林爲修撰拜監察御史
改中書禮部員外郎出爲湖廣行省左右司郎中會莫瑤蠻反右丞沙班當帥師堅不往無敢讓之者闕
曰右丞當往受天子命爲方嶽重臣不思執弓矢討賊乃欲自逸邪右丞當往沙班曰郎中語固是如獨

餉不足何闕曰右丞第往此不難致也闕下令趨之三日皆集沙班行復以集賢經歷召入遷翰林待制
出僉浙東道廉訪司事丁母憂歸廬州盜起河南陷郡縣至正十三年行中書於淮東改宣慰司爲都元
帥府治淮西起闕副使僉都元帥府事分兵守安慶于時南北音聞隔絕兵食俱乏抵官十日而寇至拒
却之乃集有司與諸將議屯田戰守計環境築堡砦選精甲外扞而耕稼于中屬縣濶山八社土壤沃饒
悉以爲屯明年春夏大饑人相食乃捐俸爲粥以食之得活者甚衆民失業者數萬咸安集之請于中書
得鈔三萬錠以賑民陞同知副元帥又明年秋大旱爲文祈灤山神三日雨歲以不饑盜方據石蕩湖出
兵平之令民取湖魚而輸魚租十五年夏大雨江漲屯田禾半沒城下水湧有物吼聲如雷闕祠以少牢
水輒縮秋稼登得糧三萬斛闕度軍有餘力乃浚隍增障隍外環以大防深塹三重南引江水注之環植
木爲柵城上四面起飛樓表裏完固俄陞都元帥廣西猫軍五萬從元帥阿思蘭沿江下抵廬州闕移文
謂猫蠻不當使之窺中國詔阿思蘭還軍猫軍有暴於境者卽收殺之凜凜莫敢犯時羣盜環布四外闕
居其中左提右挈屹爲江淮一保障論功拜江淮行省參知政事仍守安慶通道于江右商旅四集池州
趙普勝帥衆攻城連戰三日敗去未幾又至相拒二旬始退懷寧縣達魯花赤伯家奴戰死十七年趙普
勝同青軍兩道攻我拒戰一月餘竟敗而走秋拜淮南行省右丞安慶倚小孤山爲藩蔽命義兵元帥胡